

成都舊志

成都市地方志編纂委員會
四川大學歷史地理研究所 整理

民國
陳法駕 葉大鏘等修
曾鑑 林思進等纂
王曉波 王會豪 郭建強 校點

民國華陽縣志
(下)

民國二十三年刻本

民國華陽縣志卷第二十

人物第七之十四

貞烈附《貞烈表》

明蜀王四近侍 李際昌妻 劉岷妻 姜吳 二女
謝貞女 鄭建祥母 蕭建勛母妻 白烈女
劉代祥妻 伍朝堂妻 文龍母 高舉母

漢劉向撰《列女傳》，創分七目，處順則賢明仁智，處逆則節義尚焉。夫臨危授命，志不濡忍，士君子所難，況在婦女。自常道將紀公乘、二常，皆斷髮割耳，祝刀誓志，閨闈秉哲，蔚爲蜀郡士女首。嗣是以來，史或闕書。故宋元之際，蔑爾無聞。茲所甄錄明末迄今，數人而已。其咫聞片事不能成篇者，概綴表中，庶幾酷烈委灰，猶知蘭蕙云爾。

明蜀王至澍，以萬曆四十三年襲封。彭遵泗《蜀碧》。王年少，狃於承平故事，頗好文藻，爲燕游，多選良家子人侍左右。有李麗華、許若瓊、嚴蘭珍、齊飛鸞四人者，並擅才貌，而皆以抗節聞。其事流傳士大夫間，播

爲歌詠，有足稱焉。麗華父旆。年十二時，即慧敏能屬對。旆友許寬義^①，常舉「吳江月」三字令對，應聲答以「漢殿秋」，寬義驚嘆，戲呼爲「漢殿仙」。被選入宮，嘗侍宴浣溪上，王賦詩令續，今所傳「願歌沃野絕烽烟」，麗華句也。流寇犯四川，蓋自崇禎三年始，廣元僅設鎮府，以保寧同知移守。至八年，寇即由劍州、龍安兩路人蜀矣。費密《荒書》。而王尚嬉游，不知維城計，故因以爲諷。城陷，絕粒五日，弗死，吞金環乃絕。若瓊，即義寬女也，與麗華同被選，尤幸。獻賊破宮城，王與周貴妃自縊端和殿。逆奄王宣獻若瓊於賊，賊喜，封爲天順僞后。若瓊陽謝，比夜置酒，酒再行，遽起，持席上銀瓶擲賊，中額。賊怒，拔刀斫其右臂。復以左手擊賊，罵不絕口，賊嚙殺之。縣人王端所爲賦《銀瓶擊》樂府者，是其事也。蘭珍者，父椿茂，亦諸生。小字麗英，王改賜名焉。雅精隸楷，王日在麗春軒唱和，悉付蘭珍寫之。城未破，先投西苑荷池死。而飛鸞更躍入御溝以殉。飛鸞父曰珏，並華陽人。此傳約遂寧張懋中《蜀王殉難四近侍合傳》。

李際昌妻。同縣吳希舜女也。際昌家世儒者，沒時，吳年二十九歲，以有遺腹，義不得死。既生子，三

① 寬義：本傳下文云「義寬」，據文意，當指同一人，則其中必有一誤，俟考。

歲而殤，比痛絕，然心念宗祏不可以斬，適族人子甫彌月，即撫後希舜，遂立其家。吳故高明有才智，先世葬地弗善，乃卜用青烏家言，別營宅兆城南，遷四世八棺而厝之。且建坊，繚以周垣。坊成日，椎牲泣祭，薦紳耆老來者車數百兩，人人嘆服。顧汝修紀其事，稱爲用志周密，賢於一激任氣，有士君子幹濟之風焉。此傳約顧汝修《李節婦遷葬四世八棺序》。

劉崐之官激江鎮游擊也，猘夷亂，殺賊中創身死。事急時，崐妻張、妾吳及兩女一子尚在城中，或勸張爲避去計。張知崐負性剛決，戰脫不利，必死，因卻之曰：「臣死忠，婦死義，分也，爾輩早爲謀，吾志定不走矣。」袖白刃顧兩女，兩女窺母意，泣跪言：「若爾，當相從地下。」張嗚咽不勝，謂：「我家詩書門，義不辱賊。」乃刃其兩女。指幼子囑吳，令逃去，存劉後。吳亦泣言：「夫人、兩女公子並死，吾忍獨生乎？」遂相向自刎。有顧媼，乃負其子雜難民中，展轉獲免。時鄂文端爾泰督雲南，具疏於朝，得附崐賜祭建坊。

謝貞女。華陽人。以貧故，年十二，養於姑氏待年，未成禮也。舅曰陳孫容，有子紹洙，即貞女之壻。閱兩歲，紹洙病夭，貞女哀毀成疾。舅姑憐之，欲爲擇人改適。一日，送歸寧母，且令持衣笥俱。貞女至家意疑，跪請母，必還陳。母不得已，遣之。既還，泣語舅姑，誓死不嫁，日夜操作益勤，舅姑亦不忍奪其志。未

幾感疾，疾且篤，泣謂舅：「我今得爲陳氏鬼，復何憾。顧大宗無後，奈何？」舅藉慰之，曰：「勿慮，若弟紹洙生子男也，即以爲紹洙後。」貞女聞，目乃瞑，年裁十四。縣人重哀之。德慶溫瑞柏者爲作傳，徵詩紀於冊。以上二傳事本舊志。

鄭建祥母者，新都溫氏女也，嫁江西上猶縣鄭銓斌。歸上猶未久，而銓斌卒。建祥方七歲，母盛年勵節，上猶族黨無可倚託者，乃攜建祥泝流數千里，入蜀依母。家居赤立貧甚，勞動自將。十年撙節，稍以有資，乃買田華陽。而建祥從師問學，業亦有成，格於人籍年例，不得預試。退而致力耕稼，穫殖益阜，推施戚族，鄰里交稱。而母猶健在。先是，建祥兒時偶從人爲菓子戲博，進贏百數十錢。母詰問所自來，建祥不敢隱，以實對，母泣曰：「若非吾子也。」將碎其手中紡車，建祥跪請自改，由是終身不近無益之戲。建祥有子八人：昌芹，增生，舉孝廉方正，官江西縣丞；昌蔡，湖南吏目，官至澧州直隸州；昌著，附生，餘皆讀書爲善士。而孫嘉謨亦中同治庚午副貢，至今稱舊族焉。

蕭建勛母者，松潘鎮游擊太和之妾黃也。太和既卒，繼母賈年七十餘矣，而嫡子不才，盡破其產。建勛尚幼，無以爲生，母乃代鄰里家澣濯煩攬，博傭錢易炊。夜則紡績縫紉，完老弱衣履。久之，賈又卒，黃時

甫二十餘，人有勸他適者，黃泣矢曰：「先大人沒，諸郎不克自立，近且流蕩死矣。蕭氏祇此一綫，寧忍絕之耶！且他日何以見先大人地下？」竟撫建勛成人，以知縣湖北補用。咸豐四年，隨吳文節公殉難黃州堵城者也。建勛凶問至，其妻李聞之，即飲齏自殉。牛樹梅按察旌之，題其閭曰：「蕭氏一門，忠孝節烈。」蓋實錄也。李既殉，黃乃更忍死撫孫。孫即全義，後統軍臺灣，中瘴歿於埤南屯次。父子事並在《忠節傳》。

白烈女。華陽人，失其父名字。年十七，許字同里舒禎祥。禎祥爲縣吏，素謹飭，大府有公文書置吏案上，爲人竊持去，懼罪仰藥死。事聞烈女家，烈女一慟幾絕。父母驚，抱持開諭者再四。烈女誓必殉，於是晝夜使媼婢子環守。久之，審烈女哀憤平，容止宛宛如常日，竊共喜，以爲新遭變，創痛甚，宜爾浸遠浸移，或可忘，再議其餘事，護視者亦稍疏。一夕漏初下，烈女起坐背帷，淚交頤，從容扃戶，理髮訖，結束衣帶，啓匳出藥飲之卒，距禎祥之死蓋二十日也。縉紳大吏爲請於朝，得建坊如例。此傳約《濟秋集·白烈女篇》。

劉烈婦。成都余應元女。年二十，嫁華陽劉代祥。代祥故貧，又失學。父卒，而母陳饕餮鬻悍。烈婦作苦，日夜爲人縫綻，得數十錢代養陳。陳操之愈虐，烈婦致孝唯謹。生兩兒，大者紀先，六歲，小者紀元，一歲，常飢餓索飯。烈婦必俟姑食有餘乃飼兒。鄰舍嫗

無不人人嗟嘆，時或餉孟飯若數錢以助其困。有無賴子，觀烈婦色，陰啗陳酒肉，欲得爲薦寢。陳微風以意，正辭拒不可。怒，借他事撻之，吞泣引咎而已。其後謀益急，幾至不免，烈婦終不告其夫，仰天嘆曰：「嗟乎！吾不能卒侍姑矣。」仰藥遂死，年二十七，光緒十四年十月七日也。方烈婦之將死也，兒來索錢，手中僅四錢，屬紀先曰：「三錢以奉祖母，一錢餌汝弟也。」聞者莫不泣下。事聞，得旌於朝。縉紳之士共葬烈婦東門多寶寺，且表墓焉。

附劉愚《醒子山房文集·華陽孝烈劉余氏墓表》：

孝烈余氏，成都余應元女。孝烈生於咸豐二年十二月二十七日。年二十，歸華陽劉代祥。翁姑在堂，孝烈事之惟謹。劉故貧，代祥學未成，不能謀生。翁卒，貧益甚。姑陳氏，好飲啗，虐使孝烈。孝烈忍飢苦作，至爲人鍼紉，日得數十錢以養陳。陳謂弗善也，孝烈愈益和愉，襁褓弱息，自日出以至日入，力作不休，號飢不敢費一錢。鄰嫗詆之曰：「是將餓死此呱呱者耶。」孝烈掩面流涕，曰：「吾姑未早餐，今力作不足以養姑，何敢分以飼吾兒。」鄰嫗嘆曰：「賢哉孝婦！」則相與給一二錢以足之。孝烈曰：「爲姑謝若惠。」近舍婦知孝烈困乏，時遺飯一盂，則先以奉姑，如是者一二年。而陳嗜飲如故，若不知孝烈艱難憂勤中來者，稍不醉飽，鞭撻隨之，孝烈惟引咎而已。有無賴子，瞿某，其色，數以酒食啗陳，陳利賴之，命孝烈薦寢。孝烈正色辭，陳怒，私授意瞿，自引避。瞿數欲污之，不可得。孝烈知其謀，防之力，陳愈怒，手批其頰曰：「若何不自愛？」孝烈終不以告其夫，而陳、瞿謀益亟。孝烈曰：「天乎，吾不能復事姑矣！」遂仰藥死，年二十七，光緒四年十月初七日也。方孝烈之將死也，次兒紀元哭曰：「兒欲飯。」孝烈手囊中四錢，與長兒紀先，曰：「汝以三錢奉祖母，以一錢餌汝弟也。」聞者莫不酸鼻，有泣下者。既公舉

其節行，請旌於朝，而二三同志釀金會葬成都東門多寶寺側，且伐石豎道左以張之，命安福劉愚述其略。

伍朝堂。華陽程家溝農民也，娶妻高。弟朝春，娶妻楊。家僅薄田八畝，而長兄朝才執家政十年，頗有私積，遂議析產。朝堂、朝春素慤願，不敢言，則三分之。高語楊曰：「我二子，第三子，累重矣。不合力勤作，餓且死矣。」於是兄弟仍合爨。甫兩年，而朝堂、朝春相繼歿。高、楊愈益作苦，食同案，寢同榻，歲時伏臘，始一具肉，高不舉箸，楊不先嘗也。由是起家，有田四百畝。高子昌鑫、昌文，楊子昌在、昌榮、昌煥，及娶婦有孫，皆孝謹，惟兩母命是聽。一日，高復語楊：「吾先後老矣，諸子產今則不可不析，析當五子均之。」楊泣謂高：「此家似一人所造，即令兩分，猶不足爲妯娌報。」昌在等亦跪請，不聽。別居久之，高忽召戚黨，置酒，飲未半，高出語客：「吾有兩子而娣有三子。昌在，吾所愛，吾今日請諸君者，爲撫昌在爲吾子也。」乃終析其產爲五，不令己子獨贏也。壽七十餘，終。子孫雍睦數世，猶守其家法。而朝才之後，則轉零替矣。

文節母。漢州陳氏教諭炳文之第五女。適華陽文昶，三年而昶卒，無出。文孤族，無可繼嗣者。節母有姊，適同縣張文開，有男子五人，最後又生一子。未生時，節母求張定爲後，仍從張譜派，名應德。而張亦尋

寡，遂共節母居。兩家皆貧，節母初猶有微資，至是亦盡，故持生至苦。以文氏垂絕，誓延其祀，特縫紉浣濯爲活，無一刻暇。所後子應德稍長，送入塾讀，雖乏食，不令廢學。久益不支，塾師胡式金憐之，不取束脩。應德年十八，已應試，乃改名龍，補諸生。明年戊子舉於鄉，然節母苦如故。初，鄉試榜未放，城中謠言：「今年文龍當中式。」既而果然，一時盛傳節母之報。先是，新繁諸生某，六月中夢至一官府，據案者諭以君今年當捷，文龍母苦節，故暫屈君讓之。其人入省，詢於衆：「文龍果何人也？」其事乃播於外云。而考官張文達公熙初得龍卷，乙之。夜夢古衣冠人指言某號當中。往者科場程式，例糊名編字爲號以識別。百熙醒而驗其號，則所乙者也，哂曰：「夢豈足信耶！」至夜，夢復然。如是者三，心異之，乃勉取錄。及寫榜拆卷^①，審姓名爲文龍。時同舉大邑傅守中進謁，百熙告之故。守中適與文同里閭，夙稔其家事，百熙歎曰：「天也，固宜然！」又四年，龍舉壬辰進士，授刑部主事，迎節母與其本生母張就養京師，而節母道得疾，卒於舟次。其後龍官陝西漢中道。節母未受一日養，識者悲之。而張亦苦節，乃得從容十餘年豐腆以終，此人事之至不齊者。龍之舉進士，亦傳若有陰相之事。顧人第

① 拆：原作「折」，徑改。

知其爲文氏子耳，則天於節母又何薄也夫！杳冥報施，儒者所不道，然百熙在朝素持風節，而守中又端士，其所語確確如此，當時成都人知其事者明白衆著，要歸於風化所繫。今則久而漸湮，故特爲詳錄之。

高舉母。姓張氏，華陽中和場張家寺人也。父應台，縣諸生。年十九，歸高程炳，事舅與繼姑以孝謹聞。甫逾年，而程炳病卒，母年裁二十，哀痛逾恒，自是毀容深居，足不踰閭，雖親族亦罕見其面。其後繼姑連舉兩弟，又諸姑在室者數人，家事益繁，母盡力操作，或代姑保抱提攜，由是益得姑歡，故其諸叔諸姑於母亦莫不敬禮有加。及叔弟有兩子，始以舉承嗣程炳。舉方一歲，養教迄於成。立家後析爨，乃攜舉別居。自入門至是幾二十年，家雖小康，未嘗顧僕媼，炊濯煩擱並一身兼之。年五十五卒，於例當旌，國變後無復此典，而閭里苦節泯沒於不聞者多矣，可勝嘆哉！

明貞烈表

孝女	節婦	烈婦
李孝女 李爲文生廷幹女，生母劉早歿，繼母楊撫育恩勤。年十三，楊病，女割股和藥以進，遂愈。有司上聞，旌表如制。	徐大美妻劉 劉年十九，夫歿無子，撫從子起宗成立，文生。	舉人賈席慶妻潘 潘年廿餘，夫赴會試，歿於京。輓旋，潘號泣哀痛。喪畢，自縊死。旌表如制。
	文生楊惟畏妻胡 胡年十九，夫歿，遺腹一女，以贅壻子爲楊嗣，撫成立。	
	文生楊瑄妻程 程年廿九，夫歿，二子俱幼，事姑何以孝聞。子均成立。七十四卒。	
	程時信妻劉 劉年十八，夫歿，善事繼姑，撫遺腹子成立，文生。	
	文生劉南陽妻鄭 鄭年十八，夫歿，子美方周歲。苦撫成立，官戶部主事，封太安人。	
	宋元嗣妻趙 趙年十九，夫歿。遺腹生一子，撫教成立。	

清貞烈表一

孝婦	洪嘉彥妻田 田至性誠篤，翁小 愚病危，嘉彥幕於 外，田封臂和藥以 進而愈。	馮增祥聘妻陳 陳幼受馮聘，未 昏，聞增祥故， 過門守。在再數 年，未嘗見齒， 卒實志以歿。	貞女	洪貞女 洪淵女，字戴亨。年十九， 亨遠游無耗，父欲改字， 誓不適人。	烈女	何秀英 幼字唐文煥，訃至，絕粒 七日死。
洪錫爵妻朱 朱名儀，性孝，工 書畫。姑田病歿， 朱依棺號，七日水 漿不入口，竟殉。	余朝陽妻高 夫歿無子，高哭不 成聲，淚盡血，不 食三日死。	鍾桂香 鍾光燦女。未昏夫亡，矢 志不嫁。	張春蓮 幼字劉成安，聞訃，仰藥 死。	馮萬成妻余 余性孝，姑病，封 股和藥療之。萬成 遠役，姑病革，禱 天祝早歸。及歸甫 二日，姑歿，咸稱 孝感。子江、藻， 皆舉人。	張某妻郭 昏甫數月，張從征金川 歿。姑令改適，矢不 從。夫柩歸，投宅後上 蓮池死。	鍾鳳章 鍾永良女，以父母無子不 字，奉親終身。
					傅烈女 年十五，韓正吉欲污之， 不從。蜚語誣毀，憤自 經。	

龍大綬妻董姑黃病甚，萬方無效，割股和藥以愈。

包世楨妻黃黃年十八，夫歿，哀慟甚，自經死。

蒲貞女蒲映惠女。不願字人，事親終身。

鄭構貞年十七，被匪強奸，不屈死。官廳相驗，并旌之。

鍾常輝妻馮姑病，醫藥無效，馮割股和藥，服之即痊。

羅文遠妻沈沈年廿一，夫歿，祭墓歸，道經大堰，投水死。

王貞女幼字梁文海，年十七，梁天，不願改字，姑迎歸，侍女紅奉姑。

白烈女幼字舒以藩，將昏，舒暴卒，仰藥以殉。

胡承瑄妻何何年廿一，夫故無子，請姑勸翁納妾。生子洪，翁姑卒，勉庶姑苦守，撫洪子為後。祀節孝祠。

張志貞廩生曉東女孫。年十五，矢志不嫁，事父母有孝名。

胡子綬妻李姑劉病瘡，久不愈，李割股和藥進之，遂瘳。

張貞女河南參將廷蔚女。幼字湖南副將陳有功子天佑。天佑夭，女年十四，悲痛幾絕。父母以其年稚，欲改字，女矢死絕粒。知不可奪，歸陳，苦守以終。

胡椿年妻郭 郭事翁姑有孝名。 椿年病，又割股以愈之。		楊友蓮 楊成昌女。成昌無子，女願不字奉親。父病，無從得肉，女割股以進，時年十二。成昌病愈，後三年歿，友蓮長齋念佛矣。	
斐成章妻張 姑病，百治不效，張割臂和藥進，乃痊。		明貞女 明洪元女。十六許字周，因故悔婚約，誓不再字，事親以終。	
陳藍圃妻程 姑劉病劇，程禱天，割股和藥而愈。		劉卯英 呈宗女。年十六，父母兄嫂同歿，孤姪無依，願教養成立，終身不字。	
袁宗文妻孟 姑譚病篤，孟祈天告祖，願以身代，又割股進，方愈。		王貞女 以父母無子，不嫁事親。父歿，事母尤謹。母歿，繞棺慘號，感泣鄰右。	

張萬照妻周 周年廿四，夫故子

天，貧極。繼姑令
改嫁，泣矢事姑。
族人撫登長爲其
子。 祀節孝祠。

劉貞女 幼字洪爾耆。洪天，不願

改字，奉母終。

周上達妻羅 羅父母貧，七歲爲

童養婦，子一。夫
故子夭，羅漏夜力
作侍姑。左右鄰
火，延數百家，羅
倉卒負姑出，左右
灰土，茅屋僅存。
祀節孝祠。

劉葆英 榜女。念父母一子五女，

已年長，願終身不字，佐
母持家。七十八卒。

譚明和妻李 姑病久不愈，李願

以身代，且割股療
之。

劉貞女 幼字屈敬模。屈天，過門

守貞，善事姑，撫一子。

左文英妻張 家貧極。姑沈病，

萬方謀甘旨，又割
股以療。

林貞女 幼字李季平，未婚。李天，

過門守貞。

賀慶本妻李 事翁姑以孝聞。慶本大病，又刲臂愈之。		李貞女 幼字江正德。江夭，過門守貞，撫子爲後。	
鄭國瑾妻秦 翁病，秦割股愈之。國瑾病，復然。		李貞女 剛女。幼病目，微盲，願不字奉親。兄嫂歿，撫姪廷楷成立。廷楷甫有子而夭，勉婦苦守，俾子成立。	
鄭化成繼妻劉 羣盜入室，言劫其姑，劉委婉脫姑，願以身代姑行。姑已八十餘矣。僉謂劉不特孝，且智勇兼焉。		謝貞女 幼字陳孫容子紹洙，貧甚，爲陳童養婦。紹洙夭，哀毀成疾。翁姑憐之，有改字意，女矢不從。病篤，泣請翁爲紹洙立後，翁應紹洙生子即爲汝嗣，乃瞑，時年僅十四耳。	
甯占元妻吳 占元遠賈不歸，家貧，母老且病，吳盡孝，撫子爲後。		范貞祥 文生忠傳女。因父母多病，無人侍奉，不字事親。	

鄧環甫妻楊環甫卒，遺二子一女。未幾，子女偕亡，無依，歸母家。痛夫絕祀，宗族又無可撫，不得已撫弟子爲夫後，令畢業工科，費悉賴女紅。

傅貞女字蕭富鎔爲繼室，未婚蕭故，過門守貞，撫前室女子成立。

賴貞女幼字湯，未昏。湯夭，過門守貞，撫子成立。

鄧貞女梅鳳女。以父母一子，願不字奉事。弟貴興歿，佐弟婦持家。八十餘卒。

霍金壽延齡女。母蔡病，左右不離，繼母尤愛之。以女紅營父母養葬，終不字。

楊八姑父召南幕福建，三兄相繼歿，惟母及庶母。願以指力奉二母，不字人，以待父歸。母謝善病，日不離。	胡貞女附生學泗女，無兄弟姊妹。念父母無子，矢志不字，願侍奉終身。父母歿，極盡哀禮。自青年迄白首，罕見其面。六十五卒。祀節孝祠。	彭寶姑平武教諭維植女。以母死早，願不字奉父。及病，刲股和藥而愈，人稱其孝。能詩。近人詩話稱蘭閨逸史，即寶姑也。	葉貞女幼爲喬映洲童養婦。未成年，喬夭，女年十四，素服寂處終身。

側。母故，庶母李病，事如母。葬事畢，年三十八矣，適有戚宦閩，八姑偕行。至逆旅遇父，相見痛哭，哀感行人。罄所蓄侍父返成都，承歡數年。父歿，扶柩合葬母墓。

祀節孝祠。

清貞烈表二

節婦 此表人數較多，因以韻目爲次，取便察考。

湖北 知縣 洪子俊妻楊	洪元義妻王	祀節孝祠	楊年廿一，夫故親老子幼，勞苦萬端。祀節孝祠
子俊故，妹笄子幼，楊年廿餘，扶柩歸葬。嫁妹教子，備極辛勞，子乃成立。	洪鉦妻何妾張		馮國棟妻黃
涪州 訓導 洪標妻劉	何年廿九，張年廿八，同心苦志。並祀節孝祠		年廿五，夫歿。子思周。瘠田二畝，力勞糊口。祀節孝祠
年十九侍洪，事奉勤謹。洪歿，年廿五，無出，適遺不去。七十餘卒。祀節孝祠	廣東南海縣 金利司巡檢 馮光寧妻張		馮家楨妻張
洪壽錕妻黃	年廿五，夫故，子廷芳、桂芳、允芳均幼，拮据歸葬。貧甚，勤工課子。祀節孝祠		年廿四，夫故。善事姑，二子成立。七十八卒。祀節孝祠
年廿二，夫歿，無子女，勞苦終身。	馮華昆妻羅		馮祿揚妻洪
洪淵妾劉	華昆故，翁姑慟甚，姑失明。子祥瑞、炳靈幼，夫弟華岑十三，病危，羅調護數年，病痊，爲娶婦。岑天，遺子鑑湘，甫四月，羅愛甚，督教成立，爲庠生。祀節孝祠		祿揚客死榮昌，洪年十八，挈子扶柩，往返千餘里，備極劬瘁。祀節孝祠
年廿四，夫歿無子。祀節孝祠	馮恭妻楊		馮清霄妻鄧
洪謙祥妻蕭	祀節孝祠		馮興龍妻曾